

**Kalaallit Nunaanni eqqartuussisarnermik inatsisip allanngortinnissaanut inatsimmut missingiut (Pinerlunnernit eqqorneqartut inatsisitigut inissisimanerannik pitsanngorsaaneq) aamma Pinerlunnernit eqqorneqartunut naalagaaffimmit taarsiissutit pillugit inatsisip allanngortinneqarnissaanik inatsisip assigiinngitsut kunngip peqqussutaatigut Kalaallit Nunaannut atortuulernerannik peqqussummut missingiut pillugit Inatsisartut aalajangiiffigisassaattut siunnersuut**

**pillugu**

**Inatsisinut Ataatsimiititaliap**

**siunnersuutip aappassaaneerpeqarneranut**

**ISUMALIUTISSIISUTAA**

Ataatsimiititaliap suliarinninnermini ilaasortarai:

Inatsisartunut ilaasortaq Harald Bianco, Inuit Ataqatigiit, siulittaasoq  
Inatsisartunut ilaasortaq Anders Olsen, Siumut, siulittaasup tullia  
Inatsisartunut ilaasortaq Mariane Paviasen, Inuit Ataqatigiit  
Inatsisartunut ilaasortaq Mala Høy Kúko, Siumut  
Inatsisartunut ilaasortaq Knud Mathiassen, Inuit Ataqatigiit

**1. Siunnersuutip imarisai siunertaalu**

**1.1. Kalaallit Nunaanni eqqartuussisarnermik inatsisip allanngortinneqarnerannik inatsimmut siunnersuut**

Siunnersuut danskit eqqartuussisarnermik inatsisaanni 2007-ip kingorna allanngortitsinernik sisamanik tunngaveqarpoq<sup>1</sup>.

---

<sup>1</sup>Eqqartuussisarnermik inatsimmik aamma eqqartuussisarnermi akiliuteqartarneq pillugu inatsimmik allanngoneq pillugu inatsit nr. 517, 6. juni 2007-meersoq (pinerlineqartut inatsisitigut inissisimanerannik pitsanngorsaaneq), eqqartuussisarnermi inatsimmik aamma pinerlunnernit eqqorneqartut naalagaaffimmit taarsiivigineqartarnerat pillugu inatsimmik allanngoneq pillugu inatsit nr. 412, 9. maj 2011-meersoq (aneertoqarnissaani aamma iperagaasoqarnissaani il. il. ilisimatitsineq aamma pinerlunnernit eqqorneqartunut naalagaaffimmit taarsiissuteqartarnermi politiinut unnerluussisinnaanerup sivitsorneqarnera), eqqartuussisarnermi inatsimmik allanngoneq pillugu inatsit nr. 709, 8. juni 2018-meersoq (ilisimannittunik illersuineq annertusisaq) aamma inatsit nr. 629, 12. juni 2013-meersoq (pinerlineqartunut ilisimatitsisarnermik aqqissuussap annertusinera aamma pinerlunnernit eqqorneqartut naalagaaffimmit taarsiivigitinnissamut qinnuteqaataannik suliarinnittarnermut sinaakkutinik nukittorsaaneq). Inatsit nr. 517, 6. juni 2007-meersoq pillaaarnermi suliani pinerlineqartup eqqartuussisarnermi inatsisitigut inissisimannera pillugu Strafferetsudvalgip isumaliutissiissutaanik nr. 1485/2006-imik tunngaveqarsimavoq.

Pinerluttulerinermik suliani eqqugaasup (tassa pinerlineqartup) inatsisitigut inissisimanerata nukittorsarneqarnissaa, kiisalu pinerluuteqarsimasup iperagaanera pillugu imaluunniit pineqaatissinneqarnerup nalaani tusagassiorfitsigut tamanit isiginnaarneqarsinnaasuni atuarneqarsinnaasunilu pineqartoq pillugu allaatigisaqarnermut peqataasimanera pillugit eqqugaasup tusarlerneqarnissamut periarfissaata annertusineratigut, eqqugaasunut suliniuteqartarnerup patajaallisaavigineqarnissaa siunnersuummi siunertarineqarput. Taakku saniatigut siunnersuutikkut suliniutit arlallit eqqunneqassapput, pinerluttulerinermi suliani ilisimannittut illersorneqarnerunissaannik siunertaqartut.

Siunnersuut immikkoortunik pingaarnernik makkuninnga imaqarpoq:

- Ilitsersuisarneq paasissutissiisarnertu: Politiit unnerluussisussaataasullu siunnersuutikkut pisussaaffilerneqassapput pinerluttulerinermik suliap ingerlanera saqitsaannermut tunngatillugu piunasaqaateqarsinnaanerani taarsiissuteqartarnermullu tunngatillugu aalajangiisartut ataatsimiititaliaq (Erstatningsnævnet) aqutigalugu taarsiissuteqarfigineqarnissamik qinnuteqarsinnaanerani eqqugaasup<sup>2</sup> ilitsersorneqarnissaanut.

Pisussaaffik tamanna ullumikkut politiinuinnaq atuuppoq.

Ilitsersuisussaataaneq tamatuma saniatigut annertusineqassaaq eqqugaasup inatsisitigut inissisimanera pillugu, eqqugaasup suliap ingerlanerani ilisimannittut uppersaanissamut pisinnaatitaaffii pisussaaffiilu ilanngullugit, taamatullu aamma suliami allagaatinik paasitinneqarsinnaatitaanerminut periarfissaq pillugu ilitsersuineq ilanngunneqartartussanngorlugu.

Kiisalu ilitsersuisussaataaneq annertusineqassaaq suliap qanoq ingerlanissaanut naatsorsuutigineqartup ulluinnarnilu qanoq ingerlanneqarnissaanut ilitsersuineq ilaasussanngorlugu.

- Ilisimatitsisarneq naammagittaalliorsinnaanerlu: Pinerlineqartoq<sup>3</sup> siunnersuutikkut nalunaarutiginninnerit itigartitsissutigineqarnerinik, unnerluutiginnissutip taamaatiinnarneqarnerani aamma unnerluussutip unitsiinnarneqarnerani ilisimatinneqartartussanngusaaq. Pinerlineqartoq taamatuttaaq unnerluussisoqarnera kiisalu (taamatut kissateqarnermigut) pingaarnertut isumaqatigiinniarnep qaqugu sumilu ingerlanneqarnissaa pillugit, kiisalu suliaq naammagittaalliuutigineqarsimappat

<sup>2</sup> Pinerlineqartoq toqkkut qimagussimappat politiit pisussaaffeqassapput eqqugaasup qimataasa qaninnerit pineqartut inatsisitigut inissisimanerat pillugu ilitsersuinissaminnut.

<sup>3</sup> Pinerlineqartoq toqkkut qimagussimappat pineqartup ilaqutai qaninnerit ilisimatinneqartassapput.

aallarteqqinneqarpalluunniit ilisimatinneqartassaaq. Kiisalu pinerluttulerinermik suliami inuit saqitsaannerinik suliasamik piumasaaqateqartoqarsimatillugu eqqartuussiviup aalajangenera pillugu pinerlineqarsimasoq eqqartuussivimmiit ilisimatinneqartassaaq.

Pinerlineqarsimasoq malittarisassat ullumikkut atuuttut malillugit nalunaarutiginninnerup itigartinneqarneranik, unnerluutiginnissutip taamaatinneqarneranik aamma unnerluussinissap unitsiinnarneqarneranik taamaallaat ilisimatinneqarsinnaatitaavoq. Kalaallit Nunaanni Politiinili aalajangersimasumik suleriaasiuvoq taamaaqataanik suliami unnerluussisoqartillugu pinerlineqarsimasup ilisimatinneqartarnera. Taamatuttaaq taarsiivigineqarnissamik piumasaaqatit eqqarsaatigalugu eqqartuussiviup aalajangiineri pillugit pinerlineqarsimasup politiiniit ilisimatinneqartarnera aalajangersimasumik suleriaasiuvoq.

Siunnersuummi taamatuttaaq aalajangersarneqarpoq politiit unnerluutiginittoqarneranik ilisimatitsisoqarneranut atatillugu pinerlineqarsimasoq ilisimatittassagaat eqqartuussissutip assilineranik qinnuteqarnermigut pissarsisinnaatitaaneranik (paasitinneqarsinnaatitaanermut malittarisassat atuuttut naapertorlugit).

- Pinerlineqartumut ikiuuttussamik toqqaasarneq: Malittarisassat atuuttut malillugit nakuuserneq, pinngitsaaliineq, kiffaanngissusiiagaaneq aamma kinguaassiutitigut pinerluuteqarnerit il.il. pillugit suliani eqqartuussivik pinerlineqartumut ikiuuttussamik toqqaasarpoq, inatsisunik unioqqutitsineq pissutsimigut annertuuliutissaanngippat imaluunniit pinerlineqartup ikiorteqarnissaa pisariaqanngitsutut nalilerneqarpat. Pinerlineqartumut ikiuuttussap pinerlineqarsimasup tapersorsorneqarnissaa ilitersorneqarnissalu suliasarai. Ikiuuttussamik toqqaaneq pinerlineqarsimasup qinnuteqarneratigut pisarpoq, politiillu periarfissaq pillugu pinerlineqarsimasup ilitersornissaanut pisussaaffearlutik.

Pinerlineqartumut ikiuuttussaqaqtitsisarnermik aaqqissuussineq siunnersuutikkut annertusineqassaaq, taamaalilluni aamma pisuni allani pissutsit immikkut ittut tamanna pissutissaqaqtikkaangassuk pinerlineqartumut ikiuuttussamik toqqaasoqarsinnaalerluni. Tamatumani assersuutigalugu pisinnaavoq suliani sakkortuumik uumisaarinernut tunngasuni pinerlineqartut sioorasaarneqarsimappata imaluunniit aserorteriffigineqarsimappata assigisaannilluunniit pineqarsimappata. Taamatuttaaq siunnersuutigineqarpoq malittarisassamik ilanngussisoqassasoq taamaalillunilu eqqartuussivik qanigisaasut immikkut isiginiarneqarnissaasa tamanna pisariaqartippassuk pinerlineqarsimasoq pinerluffigineqarsimanini pissutigalugu toqkkut qimagussimappat pinerlineqarsimasup qanigisaanut qimagaa sunut ikiuuttussamik toqqaasinnaanngorlugu.

- Eqqartuussivinni suliaqarnerit nalaanni eqqorneqartup najuussinnaanera: Siunnersuutigineqarpoq pinerlineqartoq pisinnaatitaasoq matoqqasumik eqqartuussinerit najuuffigissallugit, matunik matoqqatitsinerup siunertaa<sup>4</sup> tamatumunnga akerliunngippat. Pinerlineqartorli nammineq nassuiaateqannginnermini matoqqasumik eqqartuussinermut nalinginnaasumik najuussinnaassanngilaq.
- Anisoqassatillugu iperagaasoqartillugulu il.il. ilisimatinneqarneq: Siunnersuutigineqarpoq pinerlineqartoq<sup>5</sup>, ingasattumik pinerluttulerinermi inatsimmik unioqqutitsineq, soorlu nakuuserneq, soorasarineq, kinguaassiuutitigut pinerlunneq imaluunniit allatut inunnut navianaatilimmik pinerlunneq, pissutigalugu pinerluuteqarsimasunik inissiisarfirmut inissiisoqarnissaanik eqqartuussisoqarsimatillugu pinerlineqarsimasoq tamatuminnga kissaateqarsimappat ilisimatinneqartassasoq eqqartussaasup siullerpaamik ingiallorteqarani aneernissaa aamma iperagaanera, tassunga ilagitillugu misiligutaasumik iperagaanera, aamma qimaasimasinnanera pillugit. Tamanna taamaallaat atuuppoq pinerluttoq eqqartuussissutip timitalerneqannginnerani iperagaasimanani eqqartuussineqartinnagu tigummigallarneqarsimanngippat. Ilisimatitsinissaq itigartinneqarsinnaavoq pinerluuteqarsimasoq eqqarsaatigalugu taamaaliornissamut pissutissaqarluarpat.

Ilanngullugu siunnersuutigineqarpoq pinerlineqartoq taamatut qinnuteqarsimaguni aamma ilisimatinneqartassasoq, pinerluttoq inissiisarfirmiitinneqarnermini apersorneqarnernut aallakaatitsinernulluunniit Kalaallit Nunaanni aamma aallakaatinneqartunut peqataappat.

- Ilisimannittut nassuiaateqarnermikkut illersugaanissaat: Ilisimannittut nassuiaateqartussat illersorneqarnerulernissaat anguniarlugu arlalinnik suliniuteqartoqarnissaa siunnersuutigineqarpoq.

Siullertut siunnersuutigineqarpoq politiit unnerluussisussaataasulluunniit eqqartuussivimmu ilisimatitsissuteqassasut ilisimannittup eqqartuussivimmi

<sup>4</sup> Suliani pinerluttulerinermut tunngasuni eqqartuussineq matoqqasumik ingerlanneqarsinnaavoq (tassa innuttaasut eqqartuussinermik malinnaanissaminnut periarfissaqartinnagit), naatsorsuutigineqartariaqarpat eqqartuussinerup ammasumik ingerlanneqarnera arlaata inuuneranik ulorianartorsiortitsisinnaasoq, tamanna suliami paasiniaanermik tunngaveqarpat, unnerluutigineqartorluunniit 18-it inorlugit ukioqarpat. Eqqartuussineq matoqqasumik ingerlanneqarsinnaavortaaq naalagaaffiit allat isiginiarneqarnissaata imaluunniit eqqartuussivimmi eqqissisimanissap torersumillu pissuseqarnissap isiginiarneqarnissaasa tamanna pisariaqartippassuk imaluunniit tamanut ammasumik suliap suliarinerani inuit ilaannik pisariaqanngitsumik narutsatsitsisoqarsinnaanera pinngitsoortinniarlugu.

<sup>5</sup> Pinerlineqartoq toqkkut qimagussimappat pineqartullu tamanna kissaatigisimappagu pinerlineqartup qanigisai qaninnerit ilisimatinneqassappat.

najuunnissaanut atatillugu immikkut pisariaqartitsisoqartillugu, eqqartuussivillu pisariaqartitsineq naapertorlugu ilisimannittumut ikiuuttassasoq.

Immikkut isiginninnissamik pisariaqartitsineq pingaartumik pisinnaavoq suliani kinguaassiutitigut pinerlunnermut, nakuusernermut, ujajaanermut, pinngitsaaliilluni ilioqqusinermit allanilu suliani ilungersunartuni, ilisimannittoq (minnerunngitsumik pinerlineqartoq) ukiuni, peqqissutsimut tunngasut (tarnikkut ilanngullugu), pinerluttuliornerup kinguneri imaluunniit kimigiiserfigineqarsinnaanini pissutigalugit immikkut sunnertiasutut isigineqarpat.

Ilanngullugu siunnersuutigineqarpoq eqqartuussiviup siunissami inuit aalajangersimasut imaluunniit inuit ataatsimoortut eqqartuussinermit tamanut ammasumut isernissaannut itigartittassagai, nalilerneqarpat ilisimannittumit peqataasumillunniit ilumoortumik nassuiaaneqarnissaa anguniarlugu tamanna pisariaqartoq, eqqartuussivillu unnerluussisussaataasup, illersuisup ilisimannittulluunniip kissaateqarneratigut (eqqartuussutissap isumaqatigiinniutigineqarnissaa sioqqullugu) siumut tamanna pillugu aalajangiisinnaasoq.

Nalilerneqarpat ilisimannittumit peqataasumillunniit ilumoortumik nassuiaaneqarnissaa anguniarlugu tamanna pisariaqartoq inuit aalajangersimasut imaluunniit inuit ataatsimoortut eqqartuussinermit tamanut ammasumut isernissaannik itigartitsisinnaaneq malittarisassat atuuttut malillugit aamma eqqartuussivinnut periarfissaareerpoq. Siunnersuutilli malitsigissavaa tamatuma pinngitsoorani pisartussanngornissaa.

Tamatuma saniatigut, ilisimannittup immikkut isiginiarneqarnissaata tamanna pisariaqartippagu, ilisimannittup ungasianiit attaveqaatit atorlugit assitalimmik nassuiaateqarsinnaaneranut periarfissat inatsisissatut siunnersuutikkut annertusineqarpat.

Annertusisamik ilisimannittunik illersuineq pillugu aalajangersakkat (inuit aalajangersimasut aamma inuit ataatsimoortut eqqartuussinerni iseqqusaannginneri tamatuminnga siumut aalajangiisinnaaneq, kiisalu ilisimannittup ungasianiit attaveqaatit atorlugit nassuiaateqarsinnaatitaalerneru) Kalaallit Nunaanni ikiaroorartulerisartut akornanni nalinginnaasumik peqqarniilliarorneq tunngavigalugu Kalaallit Nunaanni Eqqartuussiveqarneq pillugu Siunnersuisoqatigiit kaammattuuteqarneratigut ilanngunneqarnissaat siunnersuutigineqarpoq.

## **1.2. Pinerlunnernit eqqorneqartunut naalagaaffimmit taarsiissutit pillugit inatsisip allanngortinneqarneranik inatsisit assigiinngitsut Kalaallit Nunaannut atuutilersinneqarnerannik Kunnqip Peqqussutaa**

Peqqussutissatut missingiutikkut pinerlunnernit eqqorneqartunut naalagaaffimmit taarsiissuteqartarnej pillugu inatsimmik (eqqorneqartunut taarsiissuteqartarnermik inatsit) allanngortitsinerit assigiinngitsut Kalaallit Nunaannut atuutilersinneqassapput.

Eqqorneqartunut taarsiissuteqartarnermik inatsisikkut ajoquserneqartut periarfissinneqarput qinnuteqarnikkut pinerluttulerinermik inatsimmik unioqqutitsilluni ajoquserneqarnerminnut (kiisalu atisarifat ajoquserneqarnerinut il.il.) naalagaaffimmit taarsiivigineqarnissamut. Peqatigitillugu ajoqusiisumit taarsiivigineqarnissamut ajoquserneqarsimasup piumasaqaataa naalagaaffiup tigusarjaa. Naggaterpiaatigut ajoquusiisooq taamaalluni tassaassaaq taarsiissummik akiliisoq. Aaqquissuussinikkut eqqorneqartup taarsiivigineqarnissaa qularnaarneqarpoq, ajoqusiisimasooq taarsiissutissamik akiliisinnaanersoq apeqqutaatinnagu.

Peqqussutissatut missingiut immikkoortunik pingaarnernik ukunannga imaqarpoq:

- 3.500 kr. angullugit nalilimmik piumasaqaammit sukkasuumik tunniussisarnej.

Siunnersuutigineqarpoq 3.500 kr. angullugit piumasaqaatit siunissami tunniunneqartassasut, piumasaqaatit annertussusiannut uppernarsaatissamik piumasaqaanngikkaluarluni, taamaallaallu piumasaqaatigalugu piumasaqaatip piffissaagallartillugu saqqummiunneqarsimanissaa (tassa inatsimmik unioqqutitsinerup kingorna ukiut marluk qaangiutsinnagit), taamatullu aamma pinerluttulerinermik inatsimmik unioqqutitsinikkut inuup (aamma inuup nammineq pigisaanut ajoqusernerup nalaani ajoquserup tigumiaasa ajoqusernerinut) ajoquserneranut Kalaallit Nunaanni pisumut taarsiissuteqarnej pineqartoq.

- Politiinut nalunaarutiginnissamut piffissarititamik sivitsuineq.

Taarsiivigineqarnissamik piumasaqaateqarsinnaassagaanni qaqugukkut poliinut nalunaarutiginnittoqarsimanissaanut piffissaliussap sivitsorneqarnissaa siunnersuutigineqarpoq, tamatumunnga tunngatillugu aammattaaq aalajangersarneqarluni, taarsiiviginninnissaaq suliassiisutini pillaatissartalinni ajoqusigaasimasup ajoqusiisumut taarsiivigineqarnissamik piumasaqaateqarnerisooq apeqqutaatinneqassasooq. Ilanngullugu siunnersuutigineqarpoq suliat aalajangersimasut sukumiinerusumik taaneqartut piffissaliussamut ilaatinneqassanngitsut.

Malittarisassat atuuttut malillugit (pinerlunnermik eqqugaasunut taarsiissuteqartarnermik inatsimmi § 10) eqqugaasunut taarsiissuteqartarnermik inatsit

malillugu taarsiivigineqarnissamut ajunngitsorsiassaqartinneqarnissamulluunniit piumasagaataavoq inatsimmik unioqqutitsinerup pisariaqanngitsumik kinguartiterinani politiinut nalunaarutigineqarsimanissaa, tamannalu danskit pinerlunnermik eqqugaasut taarsissuteqartarnermut aalajangiisartut suleriaasiat malillugu nalunaaquttap akunneri 24-it iluanni politiinut nalunaaruteqartoqarsimanissaanik piumasagaatitut isumaqartinneqarsimalluni.

Siunnersuutikkut piffissarititaq nalunaaquttaq akunnerinut 72-imut (ullut pingasut) sivitsorneqarpoq.

Pinerlunnermik eqqugaasunut taarsiissuteqartarnermut aalajangiisartut maannamutut (eqqugaasunut taarsiissuteqarnermut inatsimmi § 10, imm. 2 malillugu) pissutsit tamanna pisariaqartippassuk piffissamik qaangiineq isiginngitsuusaarsinnaavaat (ass. ajoquserneqartoq annertuumik ajoquserneqarsimanini pissutigalugu piffissaagallartillugu politiinut nalunaarutiginninnisaminut ajoquserneqarneqarsimapput).

- Naak unnerluutigineqartoq pinngitsuutitaagaluartoq taarsiissuteqartoqarsinnaanerata erseqqissarneqarnera.

Aalajangersakkamik ilanngussisoqarpoq taamaalillunilu inatsimmi piumasagaatit allat naammassineqarsimappata taarsiissuteqartoqarsinnaalluni naak pinerluttulerinermik suliami unnerluutigineqartoq pinngitsuutitaagaluartoq.

Inatsisinik atuuttunik erseqqissaaneq tamatumani taamaallaat pineqarpoq. Taamaalilluni inatsisit atuuttut malillugit (taamatutaaq pilerlunnernit eqqugaasunut taarsiissuteqartarnermut aalajangiisartut suleriaasiat malillugu) eqqugaasumut taarsiissuteqarnissamut pinerluuteqarsimasup pineqaatissinneqarsimanissaa piumasagaataaangilaq. Taamaalilluni eqqugaasunut taarsiissuteqartarnermut inatsimmi § 6-imi aalajangersarneqarpoq taarsiissuteqartoqartassasoq ajoquusiisoq ilisimaneqanngippat nassaarineqarsinnaanngippalluunniit, taamatullu aamma ajoquusiisup 15-it inorlugit ukioqarnera naatsorsuutigineqarsinnaannginneralu apeqqutaatinnagit. Taamaattorli pinerluttoqarsimanera uppersarneqarsinnaassaaq.

## **2. Siunnersuutip Inatsisartuni siullermeerneqarnera**

Siullermeerinninnermi siunnersuut tamanit tapersorneqarpoq.

Partiilli ataasip tikkuarpaa annertuumik pinerlineqarsimasut ilungersunartunik kingunerlutsitsigajuttarmata, taakkulu nakorsarneqarnissaminnut periarfissaqarnissaat pinsinnaatitaaffinnit siunnersuummi matumani pineqartunit assigiinngitsunit eqqugaasumut

iluqaqaanerusinnaammat. Allatut oqaatigalugu; periarfissarsiuutsigu, pinerlineqarsimasut inatsisip allanngortinneratigut pisinnaatitaaffitsik atorlugu kingunerlutsitsinerminnik nakorsarneqarnissamik periarfissinneqarnissaat. Partiip pineqartup tamanna tunngavigalugu ataatsimiititaliamut kaammattuutigaa kingunerlutsitsinernut nakorsartinnissamut pisinnaatitaaffik siunnersuummut ilanngunneqarsinnaanersoq sukumiinerusumik misissoqqullugu, inuiaqatigiinnimi pinerliffigineqarsimasorpasuit kingunerlutsitsinerminnik nakorsarneqartarnerat annertusarneqartariaqarlunnarmat. Tamanna pisariaqarlunnarpoq pinaveersaartitsineq iluatsilluartoq angussagutsigu. Allatut oqaatigalugu pinerlineqarsimasut inatsisip allanngortinneratigut pisinnaatitaaffitsik atorlugu kingunerlutsitsinerminnik nakorsarneqarsinnaanissaat periarfissinneqartariaqarpoq.

Inatsisinut Ataatsimiititaliap tamatumunnga atatillugu oqaatigaa minnerunngitsumik inummut navianartumik pinerluttuliornernit eqqugaasut kingunerlutsitsinernut pinerluffigineqarnerup pineqartup malitsigisaanut nakorsarneqarsinnaanissaannik pisariaqartitsisoqarnera ataatsimiititaliap isumaqatigimmagu. Ataatsimiititaliali taamaattoq oqaatigisariaqarpar tamanna Namminersorlutik Oqartussat suliaasaqarfigimmassuk, taamaattumillu tamanna pillugu Kalaallit Nunaannut eqqartuussisarnermik inatsimmi aalajangersakkanik ilanngussinissaq ajornassalluni.

### **3. Ataatsimiititaliap oqaaseqaatai inassuteqaataalu**

Ataatsimiititaliap pitsaasutut isigaa siunnersuutikkut eqqugaasut inatsisitigut inissisimanerat nukittorsarniarneqarmat nalinginnaasumillu siunnersuut ilalersinnaallugu.


Ataatsimiititaliap isumaqatigiittup siunnersuutip akuersissutigineqarnissaa inassutigaa.

Taamatut oqaaseqarluni ataatsimiititaliap siunnersuut aappassaaniigassanngortippaa.






Harald Bianco  
Siulittaasoq  
*Inuit Ataatigiit*



Anders Olsen  
*Siumut*



Mariane Paviassen  
*Inuit Ataatigiit*



Mala Høy Kúko  
*Siumut*



Knud Mathiassen  
*Inuit Ataatigiit*